

REGIONAL NEWS

HEADLINES

1. PWD Minister Pu Vanlalhlana'n fur ruahtui tlain inkalpawhna kawng chhia a thlen chungchangah theihtawp an chhuah tih a sawi.
2. Parliament sessionah vawiin khan Rajya Sabha MP Pu K. Vanlalvena chuan Mizoram chanchinbu mite harsatna chungchang a sawi.
3. Vawiin khan sawrkar laipui chuan Bangladesh buaina chungchangah Political Party tin aiawh inhmukhawm New Delhi-ah a ko.
4. Paris Olympic 2024 ah Neeraj Chopra chuan javelin throw ah qualification paltlangin final a lut.

<><><>

PWD MINISTER

PWD Minister Pu Vanlalhlana chuan fur ruahtui tlain inkalpawhna kawng chhia a thlen chungchangah theihtawp an chhuah tih vawiin khan thuchhuah siamin a sawi a.

Hetianga khuarel chhياتna a lo thlen hian PWD chu a tuar nasa ber pawl Department a ni ziah a. Tun tum chhياتna ah pawh hian an kawng enkawlte him aram a awm lo tluk a ni a ti a. May ni 28-a Cyclone Remal-in a chhut atang khan kawng chhia hriat tur a awm mawlh mawlh mai a. Kawng thenkhat chu metre 100 dan lek leka ping tlat te awmin kawng thenkhat phei chu a kawng chhuat bal nasa tak te, bal hlawk te a awm a. Heng chhياتna hrang hrang thawmtha tura PWD-a a thawhpuite - a te ber atanga a hotu lian ber thlenga theihtawp an chhuahnaah lawmthu a sawi.

Minister chuan leimin then hi zan thim, kawng chung lam atanga lung lo lum thei leh thing lo tlu thei hmu chiang lo chuan thawh mai chi a ni lo tih sawi bawkin nunna chan hial pawh awm theih a ni a. Hetiang taka fimkhur ngai a nih avang hian experience lo ngah tawh zawk Officer-te chuan a theih hram chuan zan thim hnuiaia thawk lo turin field lama hna thawktute pawh an chah a ni a ti.

Hetihlai hian, sum dinhmun a that lutuk loh avangin sawrkar tan pawh luhaithlak takzet tih sawi bawkin PWD Minister chuan tunah hian leimin thenna ringawt pawh mi tam tak hnenah vaibelchhe tel leiba an nei a ti a. An khawl hawh-na te pawh dawhthei taka nghak tura ngenin, Central leh State sawrkara Finance lam enkawltute pawh a bik taka an harsatna ngaihtuhsak turin a ngen tih a sawi a ni.

<><><>

CM

National Highway No 306 leh 06, Vairengte leh Sairang inkara kawngpui laih mekah Forest Clearance chungchang harsatna relin vawiin khan Chief Minister Pu Lalduhoma hovin CM Conference Hall-ah an thukhawm.

Chief Minister chuan, he kawngpui pawimawh tak hi tha taka sial a nih theih nan sawrkar laipui hruaitute a be thin tih sawiin an thuthlukna te chu a hriattir dawn tih a sawi a, a tul chuan amah ngei pawhin a umzui tur thu a sawi bawk.

Kal khawm te hian hian hmalak dan tur tha nia an hriatte an sawi a, an meeting minute hi sawrkar laipui lam hriattir thuai ni se, an ti.

He meeting-ah hian PWD Minister Pu Vanlalhlana, EF & CC Minister Pu Lalthansanga, FCS&CA Minister Pu B. Lalchhanzova te bakah sawrkar official te, NHIDCL hotute, Environmental NGO Coordination Committee aiawh te, Vairengte leh Sairang inkara Land Owners Association hruaitute an tel a ni.

<><><>

K VENA

Parliament session kal lai mekah vawiin khan Rajya Sabha MP Pu K. Vanlalvena chuan Mizoram chanchinbu mite harsatna chungchang a sawi a.

Chanchinbu registration title online-a dilna form-ah duh thlan theih tur tawng hrang hrangte ziah tlarnaah Mizo tawng telh a nih ve loh thu sawiin, Mizo tawng hmangtute zinga chanchinbu chhuahna tur dilna form-ah Mizo tawng a tel loh avangin Mizo tawng chanchinbu a chhuah theih dawn loh tihna a nih avangin online-a dilna form-ah Mizo tawng telh ngei a phut thu a sawi a ni.

Hemi thu hi Pu K. Vanlalvena chuan Union Minister of Information and Broadcasting Pu Ashwini Vaishnaw hnenah ziakin a thlen nghal bawk a ni.

<><><>

NATIONAL SPACE DAY

North Eastern Space Applications Centre (NESAC) leh Mizoram Remote Sensing Application Centre (MIRSAC) huaihawtin vawiin khan National Space Day 2024 Assembly House Annexe, Treasury Square ah hman a ni a. School Education Dept minister Dr. Vanlalhlana'n in a hmanpui. Minister chuan thusawiin zirlai kalkhawmte chu technology thang chho zelah an rilru leh ngaihtuahna te senga vansang thiamna kawng hrang hrang mihring ten an hman tangkai dan ngaihtuaha Scientist leh Engineer te cho na thar pek tum turin a fuih a ni.

He hun hi Planning & Programme Implementation Dept Secy Pu Lalmalsawma Pachuau chuan a kaihruai a. Mizoram chhunga district tina High School leh Higher Secandary School thlan bik ten vansang thiamna lama India ram dinhmun inelna buatsaiha a ti tha zual 3 - Govt. Saitual Higher Secandary School, Govt. Mizo Higher Secandary

School leh Synod Higher Secondary School te hnenah lawmman hlan an ni.

Sawrkar laipuiin nikum August ni 23 a thla leilunga Chandrayaan-3 hlawhtling taka a tum tir pualin kumin atangin National Space Day kumtin lawm turin ruahhmanna siam a ni a, kumin thupui atan Touching Lives while touching the Moon: India Space Saga tih hman a ni.

<><><>

RD MINISTER

Rural Development Minister Prof. Lalnilawma chuan vawiin khan Khawzawl District-a MzSRLM Commercial Centre Puilo leh Chawngtlai khua a tlawh a. Sawrkar hotute, kuthnathawktute leh khawtlang hruaitute nen hmasawna kalpui dan tur a hmunah an sawiho.

Prof. Lalnilawma chuan Puilo khuaa MzSRLM Commercial Centre chu tlawhin, centre chu tangkai taka hman dan tur sawrkar hotute leh kuthnathawktute nen inkawma neiin an sawiho a. He mi hnu hian Chawngtlai khuaa MzSRLM Commercial Centre vek chu tlawhin, kuthnathawktute leh khawtlang hruaitu tê a kawm a ni.

Prof Lalnilawma hian a department chan dang PHE Department, Khawzawl WATSAN Division pawh tlawh nghalin, hmasawna kal dan thawktute nen an sawiho a ni.

<><><>

ULLAS MELA

School Education Minister Dr. Vanlalhlana'n 'ULLAS Mela leh Mizoram Samagra Shiksha Exhibition 2024' ni hnih aw h tur vawiin khan Aizawl Govt. Mizo High School Multipurpose Hall-ah a hawng a. Exhibition hian August 7thleng a aw h dawn a ni.

Dr. Vanlalhlana chuan thusawiin Samagra Shiksha hmalakna avang hian zirna hi a kal țawk țawk a, an hmalakna hi a pawimawh hle a ni a ti a. Mizoramah hian zirnain hma a sawn loh chuan khawtlangah zan mut theih loh khawpa buaina te, chungkaw buaina te a awm thin a, khawtlang leh chungkua hahdamna hi an tuak chhuah a ngai a ti.

ULLAS-in a tum chu mi zawng zawngin ziak leh chhiar an thiam theihna atana hmalak a ni a; Mizoram sorkarin zaah za ziak leh chhiar thei tura țan a lakna a ni.

Samagra Exhibition-ah hian Stall hrang hrang 22 siam a ni a, heng stall-ah te hian ULLAS chungchang leh Mizoram zirlaite tana Samagra Shiksha hnathawh chi hrang hrang phochhuah a ni a, Samagra Shiksha hnathawh mai bakah MBSE, SCERT leh PM Poshan hnathawh leh hmalaknate phochhuah a ni bawk.

<><><>

CHAMPHAI MZP

Mizo Zirlai Pawl Champhai Hqtrs chuan Govt Champhai College a Political Science leh Economics Dept zirtirtu indaihlohna tur thu delhkih sorkarin a neih loh avangin lungawilohna an lantir chhonzawm dawn tih vawiin khan thuchhuah siamin an sawi a,

Naktukah Sawrkar pisa bakah Bank hrang hrang pisa kai turte an dang dawn a, he tih lai hian zirna in leh OPD bakah tul bik thil tih ngai awm te chu a huam lo ang tih an sawi a ni..

Govt. Champhai College-a Political Science leh Economics Dept zirtirtu indaihlohna hnawhkhat tura Sawrkar an ngen chungchangah Sawrkar lamin tun maia hnawkhah a harsat thu an sawi chu Sawrkar dinmun an hriatthiam pui thu MZP chuan an thuchhuahah chuan an

tarlanga. He tih lai hian August thla chhunga Mizoram College hrang hranga zirtirtu te rualkhai taka siam rem a tum chu ngaihchan tha an tih thu tarlangin, zirtirtu siam rem ah Sawrkar chu Govt. Champhai College a zirtirtu indaihlohna Political Science leh Economics dept chu a hnawh khah sak ngei turin an ngen tih an sawi a ni.

<><><>

FLORIST FAIR

Mizoram Florists Association buatsaih Florist Fair 2024 chu vawiin khan Aijal Club Park ah Pi Liansailovi, Chief Minister nupui in a hawng. Fair hian ni 9 zirtawpni thleng a awng.

He hunah hian pangpar chingtu leh khawia ei zawng mi thahnem tak an tel a, Horticulture dept hotu thahnem takin an telpui a ni.

Mizoram Florists Association hi ni kum 1997 November ni 16 khan din a ni a, tunah hian an kum 27- na an hmang mek a ni. Mizoram Florists Association Mizoram te hi sawrkar nen tangkawpin sawrkar hmun pawimawhte chei mawi leh enkawl hna an thawk thin a, Lengpui Airport chung lam leh pawn lam pangpar leh plant chi hrang hrang chin leh enkawl hna pawh kum 20 chuang an lo thawk tawh a ni.

<><><>

ALL PARTY MEETING ON BANGLADESH ISSUE

Vawiin khan sawrkar laipui chuan Bangladesh buaina chungchangah Political Party tin aiawh inhmukhawm New Delhi-ah a ko a. He hunah hian External Affairs Minister Dr.S.Jaishankar chuan party hruaitute hi buaina thlen dan kimchang a hrilhfiah a. He hunah hian Defence Minister Rajnath Singh, Union Home Minister Amit Shah, Parliamentary Affairs Minister Kiren Rijiju, leh Union Minister leh BJP President J P Nadda te pawh an tel a. Lok Sabha Leader of Opposition Rahul Gandhi, TMC leader Sudip Bandyopadhyay, NCP(SP) leader Supriya Sule, RJD leader Misa Bharti, SP leader Professor Ram Gopal Yadav DMK hruaitu T R Ballu te pawh an tel a ni.

Bangladesh-ah hian zirlai te lungawilohna lantir avanga tharum thawhna nasa chho zel vangin Bangladesh Prime Minsiter Sheikh Hasina chu nimin khan a nihna atangin a bang a. Sipai helicopter hmangin an ram chhuahsan nghal a ni. Prime Minister ban thu hi Army Chief General Waker-Uz-Zaman chuan tichiingin sipaiten sawrkar lailawk an kaihruai tur thu a puang a. Ramchung mipuite chu dawhthei taka awm tur leh remna vawng nung hram hram turin a ngen a ni.

Bangladesh media te sawidanin PM Hasina hi a chenna hmun Gonobhaban-ah lungawilohna lantir mi za chuang an luh avangin hmun him lamah a tlanchia a.

Pathianni khan mipui lungawilo leh police te intawngnaah mi 100 chuang an thi a, mi 1000 chuangin hliam an tuar a ni.

Puan tawh angin Bangladesh ah hian sawrkar hnaah kum 1971 a Pakistan laka Bangaldesh zalenna sualtute tu leh fate tana zaa 30 hauhsak anih duh loin zirlai tam takin lungawlohna an lantir a. Thla hmasa atang khan buaina hi a intan a ni.

Hetihlai hian Air India chuan Bangladesh-a lut leh chhuak an thlawhna thlawk zawng zawng nimin atang khan an titawp nghal a ni.

<><><>

PARIS OLYMPIC

Paris Olympic 2024 ah Neeraj Chopra chuan javelin throw ah qualification paltlangin final a lut. Neeraj Chopra hian 89.34m a khawh thleng a ni. Hetihlai hian hmeichhe wrestling 50kg freestyle ah Vinesh Phogat chuan Japanese world champion hnehin quarterfinal a lut a ni.

<><><>